

20
22

ISLA((•))ONLINE

Noticia Transparente di Gobierno

Diamars 1 November 2022

Email: IslaOnline@gobierno.aw Tel: 528-4952



Gabinete Wever-Croes //



ISLA
ONLINE

Noticia di Gobierno



ARUBA TA ANFITRION DI CONFERENCIA TOCANTE PREPARACION Y RESILIENCIA FINANCIERO DEN CASO DI CALAMIDAD PA PAISNAN DEN CARIBE



Prome Minister Evelyn Wever - Croes a atende un conferencia tocante con como isla por ta mihor prepara pa tur tipo di disaster natural 'Comprehensive Disaster Risk Management, and Financial Resilience Workshop for Overseas Countries and territories in the Caribbean'. Aruba ta cede di e conferencia aki organisa pa Banco Mundial y Union Europeo, conhuntamente cu diferente stakeholder relaciona cu preparacion financiero den caso di calamidad.

Presente na apertura di e conferencia ta entre otro miembronan di Parlamento, Colega Minister di Asuntonan Economico, Comunicacion y Desaroyo Sostenibel Geoffrey Wever, di World Bank sr. Federico Baechi, sra. Mary Boyer y sr. David Sislen, di Caribbean Catastrophe Risk Insurance Facility (CCRIF SPC) sr. Isaac Anthony y sra. Elizabeth Emanuel, di delegacion di Union Europeo na Guyana sra. Layla El Khadraoui, representantenan di RESEMBID regional program,

y tambe representantenan di Caribbean OCT.

Primeramente Prome Minister Wever - Croes den su discurso na apertura di e conferencia a indica cu e ta sumamente esencial pa como Isla Chikito den Desaroyo (SIDS) pa ta uni, y pa comparti experiencianan den Caribe ora cu ta confronta cu crisis regional y disasternan natural. E ta importante tambe pa ta consciente di con importante e ta pa ta financieramente resiliente pa por recupera mas pronto cu ta posibel despues di un disaster. Aruba te cu awo ta bendiciona pa no a sufri di desasternan grandi. Sinembargo, ta consciente di e riesgo cu disasternan natural por tin riba e isla, negoshinan, comunidad y medio ambiente. Caribe ta e area cu tin mas riesgo pa catastrophe natural manera horcan. Ademá, Aruba tin responsabilidad social cu otro islanan den Caribe cu regularmente ta afecta pa disasternan natural, manera horcan.

Continuacion ARUBA TA ANFITRION DI CONFERENCIA TOCANTE PREPARACION....



SEGURO DEN CASO DI CALAMIDAD

Prome Minister Wever - Croes a sigui splica cu un di e instancianan na e workshop ta specialisa den e area di seguro, y nan lo amplia riba e posibilidadnan cu paisnan tin pa cera un seguro. Den e caso di cualkier calamidad, e compania ta percura pa provee e fondonan aki dentro di dos siman pa e pais afecta. Recientemente Nicaragua y otro dos pais den region, a haya e fondonan aki den dos siman y asina nan por a cuminsa traha riba recuperacion. Mayoria di isla cu ta depende di fondo turistico no tin e forsa financiero grandi cla, pa ora cu un calamidad dal. Pues e tipo di workshop nan aki ta yuda paisnan pa prepara nan mes pa esey.

TRABOU REALISA DOOR DI BRA

Aruba su delegacion ta presente na e workshop pa siña mas y pa por ta mihor prepara. Bureau Rampenbestrijding Aruba (BRA) tin e responsabilidad pa prepara nos den caso di cualkier disaster. Esaki ta encera diferente aspecto, no solamente e ser humano, tecnologia, data etc. E ta encera mantene hende sigur, conecta e informacion y na aspectonan cardinal di maneho di negoshinan, pa nan por keda den operacion den un situacion di crisis/disaster. Organisacionnan cu ta planifica, prepara y percura pa ta entrena den caso di interrupcionnan inespera, a muestra di ta esunnan cu ta recupera nan operacion normal mas liher cu otro. Prome Minister a splica cu den cuadro di esaki BRA a desaroya un "Aruba Incident Management System", di acuerdo cu recomendacionnan y practicanan internacional.

E sistema aki ta provee structuranan standarisa pa organisacionnan, pa loke ta funcionamiento, procesonan y terminologia pa uza na diferente nivel di emergencia "emergency response" na Aruba. E "Aruba Incident Management System" ta atende cu e necesidad pa coordinacion ora cu tin di haber cu 'response' di tur tipo di incidente, di parti organisacionnan di Aruba y partnernan rond mundo. E sistema ta integra practicanan efectivo y ta encera preparacion den caso di emergencia y con pa responde, den cuadro nacional pa maneho di cualkier incidente. Ademá, e Aruba Incident Management System, lo hacie posibel cu esnan encarga cu 'response' na tur nivel lo traha hunto mas efectivamente, pa maneha incidentenan domestico, no obstante e causa, tamaño of con complica e



situacion ta. Prome Minister Wever - Croes a enfatisa cu BRA ta haciendo hopi pa perura cu na Aruba profesionalnan ta prepara adelanta, y aworaki falta e aspecto financiero pa no mester ta depende di otro y asina por reacciona mesora den caso di calamidad.

Concluyendo Prome Minister a remarca: 'Varios pais cu ta depende grandemente di turismo a experencia e consecuencia di COVID y con vulnerabel ta, no solamente den caso di un disaster natural, pero pa cualkier tipo di crisis. Ta pa e motibo aki cu e tipo di workshop nan aki ta asina importante.' Prome Minister Wever - Croes a finalisa bisando cu a traves du e workshop gobierno y specialistanan den maneho di disaster lo siña mas di recomendacionnan y accionnan cu por aplica den caso di cualkier disaster, cual ta ilustra e importancia y forsa ora cu traha hunto.



Ursell Arends
Minister di Transporte, Integridad,
Naturalesa y Asuntonan di Adulto Mayor.

LES DI AGRICULTURA Y HORTICULTURA BASICO



Diasabra mainta Minister di Naturalesa Sr. Ursell Arends a bishita Santa Rosa Aruba pa atende e prome les practico di Horticultura Basico cu a wordo organisa via Enseñansa pa Empleo.

Durante e bishita Minister Arends a haya un recorrido di ful e tereno di Santa Rosa pa asina siña di tur e servicionan disponibel pa agricultor y criado di bestia. Durante e curso di 6 siman participantenan lo siña prepara gordura, planificacion di tereno, irrigacion y mucho mas pa asina participantenan por crea nan propio hofi. Por tuma contacto cu Enseñansa pa Empleo pa inscribi na e curso.



Un palabra di gradicimento pa e oportunidad pa atende e prome les, "ta un alegria pa mira e interes den agricultura den nos comunidad y asina hunto nos por sigui promove desaroyonan den sector primario cu e meta pa hisa seguridad di alimentacion na Aruba," Minister Arends ta comenta.



TRAINING 'EDUCA CU CULTURA' PA TEAM DI MANA



Na luna di oktober ultimo, director interino di Museo Arqueologico Nacional di Aruba (MANA) a organisa un tayer pa personal di e museo. E training aki a tuma luga den auditorio di MANA.

E training tabata bou di guia di Lupita Gil, ex-director di UNOCA y actual miembro di UNOCA, Ray-anne Hernandez actual director di UNOCA y Ruby Eckmeyer, kende ta e especialista pa e programa di cultura na secretariado di Comision Nacional pa UNESCO di Aruba.

Meta di e training ta pa introduci varios terminologia cu ta uza ora ta trata di un maneho di cultura y tambe pa haya informacion di e contenido di e maneho integral di cultura di Aruba y su relacion cu e metanan pa Desaroyo Sostenibel

(SDG) di Nacionnan Uni.

E tabata un training interactivo, den cua e participantenan por a intercambia idea y experiencia. Reaccion di e participantenan tabata hopi positivo y nan a pidi pa den futuro continua cu mas training. Nan a trece dilanti e importancia pa intercambio di informacion y di e colaboracion di trabou cu otro profesional den e sector di cultura.

Den cuadro di e programa Culture and Arts Education di UNESCO por spera den futuro mas riba tereno di educacion cultural na Aruba den colaboracion cu e diferente instancia y organisacionnan. Pa e museonan na Aruba entre otro lo bay prepara organizacion di diferente mas training.

GOBIERNO DI ARUBA TA ANUNCIA CU A BOLBE CUMINSA CU BON BINI FESTIVAL



Cu sumo placer Fundacion Museo Arubano, cohuntamente cu Aruba Tourism Authority y Gobierno di Aruba ta anuncia cu recientemente a cuminsa cu e prome Bon Bini Festival na Fort Zoutman situa den Oranjestad.

E festival aki desde su comienso na 1985 (47 ana pasa) a sa di ofrece un plataforma balioso pa asina tin interaccion cultural pa bishitantenan local y turista. Durante cada show di Bon Bini Festival por experiencia nos historia, gastronomia, musica, baile y folklore cu ta wordo presenta den un forma di celebracion.

Pa Fundacion Museo Arubano ta un honor pa por presenta Bon Bini Festival un biaha mas desde cu mester a limita nos operacionan di trabou pa motibo e pandemia pa e ultimo 2 ananan.

E peticion pa bin bek cu e show ganador di e “Trip Advisor Award” di parti diferente partners, comunidad y turista tabata impresionante. Un danki ta bay na tur persona cu ta forma parti di e team pa hasi esaki posibel. Especialmente e artistanan cu a sa di impresiona e publico presente.

Nos ta invita pueblo di Aruba pa sigui e facebook page di Bon Bini Festival pa asina wak e fechanan cu lo presenta e grandioso Bon Bini Festival. E luna aki lo tin Bon Bini Festival riba 1 di november y 8 di november. Entrada ta costa solamente Awg 15.00 pa local y \$15.00 pa turista. #MinFIC

WE ARE BACK!

BON BINI

FESTIVAL

**1 and 8
November 2022**

FOOD | BAR | LIVE SHOW
*DOORS OPEN AT 6PM, SHOW STARTS AT 7PM


MUSEO HISTORICO ARUBA | FORT ZOUTMAN

\$15
admit one
01234



MINISTER ENDY CROES A RICIBI E GIMNASTANAN DI PERLA GYMNASTICS ARUBA

Dialuna merdia Minister Endy Croes a ricibi e gimnastanan di Perla Gymnastics Aruba cu a yega cas bek for di Panama. E gimnastanan a logra conquista un record di medaya den e campeonato Copa IGA 2022 cu a tuma luga siman pasa na Panama. Minister Endy Croes ta felicita e atletanan pa nan excelente presentacion y pa laga Aruba su nomber briya den exterior. Mandatario di Deporte a gradici e coachnan como tambe e mayornan pa sostene nan yiunan den nan deporte. Masha pabien!



Minister Endy Croes:

CONTAINER CU MATERIAL DI DEPORTE A YEGA ARUBA



Dialuna mainta Minister Endy Croes a habri container cu a yega Aruba cu diferente materialnan deportivo segunda mano den bon condicion. Stichting Sports for Children di Hulanda ta busca e materialnan deportivo y den nan contacto estrecho cu Sport for Youth Foundation di Aruba a organisa e proyecto aki. Hunto e dos fundacionnan aki ta busca e materialnan di scolnan y luganan deportivo na Hulanda. Nan ta trecenan Aruba unda Sport for Youth Foundation tin un lista na unda nan lo entrega e materialnan. Durante e siman aki ta repartinan na diferente scolnan cu a “sign up” pa e programa. Minister Endy



Croes a expresa cu e ta sigur un bunita gesto. E mandatario di Deporte a sigui bisa como Gobierno nos ta sostene tipo di proyecto di intercambio. Cu sigur lo yuda diferente scol pa e alumnonan tin materialnan deportivo pa por practica deporte.

Pa finalisa Minister Endy Croes ta gradici Sport For Youth Foundation como tambe Sports For Children di Hulanda. Nos a compronde cu final di luna di november cuminsamento di december un otro contrainer ta yegando unda cu nos ta duna nos aporte un biaha mas. Hunto nos ta logra!

MINISTER ENDY CROES A REUNI CU CONSUL GENERAL DI MERCA SRA. MARGARET BOND

Siman pasa mandatario di Enseñansa a ricibi bishita di Consul General di Merca na Curaçao, sra. Margaret Bond. Den un esfera ameno a reuni unda combersa hopi amplio riba riba diferente topiconan manera e.o. colaboracion entre Merca, Aruba y EducationUSA Aruba. A dialoga riba e posibilidadnan pa un scol na Ingles cu nan a cuminsa como scol piloto na Curaçao pa scol preparatorio y basico na unda Merca a inverti den e proyecto aki. Ta bay sondea posibilidad pa Aruba tambe wordo brinda un oportunidad asina.

Concluyendo Minister Endy Croes a enfatisa cu e tabata un bon reunion; nos ta trahando pa estrecha e laso riba colaboracion riba diferente tipo di proyectonan enfocando riba deporte y enseñansa.



Feliz diamars!

DESPUES DI TEMPONAN DIFICIL
CU NOS A PASA ADEN,
NUNCA NOS MESTER LUBIDA
E FORSA IMPRESIONANTE,
E RESILIENCIA Y SOLIDARIDAD
CU NOS A MUESTRA OTRO COMO
CIUDADANO, FAMILIA Y
COMO PARTI DI E COMUNIDAD MUNDIAL.
HUNTO NOS MESTER ACTUA, INNOVA,
ADAPTA Y AVANSA Y
RECONSTRUI NOS PAIS.



**20
22** | AÑA DI
INVERSION Y
OPORTUNIDAD